

ԿԵՆՍԱԳՐԱԿԱՆ

ԱՐԻՍՏԱԿԷՍ ԵՊԻՍԿՈՊՈՍ ՍԵԴՐԱԿԵԱՆԻ ԿԵԱՆՔՆ ՈՒ ԳԻՏԱԿԱՆ ԺԱՌԱՆԳՈՒԹԻՒՆԸ

Արիստակէս Եպիսկոպոս Սեդրակեանը նշանակալից դեր է ունեցել Հայ եկեղեցու, մանկավարժութեան եւ հայագիտութեան պատմութեան մէջ՝ յատկապէս XIX-XX դարերի շրջադարձային ժամանակահատուածում: Նա յայտնի է իր աստուածաբանական գիտելիքներով, ազգային-եկեղեցական հարցերում իր սկզբունքային դիրքորոշմամբ եւ հայագիտական հետազոտութիւններով, որոնք իրականացրել է հոգեւոր գործունէութեանը զուգընթաց: Որպէս եկեղեցական գործիչ՝ նա գործուն մասնակցութիւն է ունեցել ազգային խնդիրների քննարկմանը, պաշտպանել է հայ եկեղեցու իրաւունքները եւ կարեւորել է հոգեւոր դաստիարակութեան դերն ու նշանակութիւնը թէ՛ հայրենիքում եւ թէ՛ նրա սահմաններից դուրս:

Հայագիտութեան զարգացման գործում աւանդ ունեցած հայ տեղագիր Արիստակէս Եպիսկոպոս Սեդրակեանը բազմաբովանդակ գործունէութիւն է ծաւալել Արեւելեան Հայաստանում, Վրաստանում, Ռուսաստանում՝ զբաղեցնելով պատասխանատու մի շարք պաշտօններ: Ուսումնասիրութեան տեսանկիւնից կարեւոր է հոգեւորականի տեղագրական, յատկապէս՝ վիմագրագիտական ժառանգութիւնը, նրա շնորհիւ մեզ են հասել վիմագրեր, որոնք վերացել կամ եղծուել են բնական ու մարդկային գործօնների արդիւնքում:

Մեր նպատակն է մի կողմից ներկայացնել Ա. Սեդրակեանի կենսագրական մանրամասները, միւս կողմից՝ վիմագրագիտական գործունէութիւնը՝ յենուելով նրա տպագիր եւ անտիպ ուսումնասիրութիւնների վրայ¹:

Տեղագիր, բանասէր, պատմաբան, թարգմանիչ, էջմիածնի միաբանութեան անդամ Արիստակէս Սեդրակի Մելիք-Առաքելեանը ծնուել է 1844 թ. Օգոստոսի 23-ին Խալֆալու գիւղում: Երեւանի նահանգի Սուրմալուի գաւառում գտնուող այս բնակավայրը յայտնի էր նաեւ Գալֆալու, Դալֆալի, Դալֆալու տարբերակներով: XX դարասկզբին այն ունէր 100 տուն՝ 1089 հայ բնակչով, որոնք, ցաւօք, 1920-ական թթ. տեղահանուել են²:

Անյայտ է Մելիք-Առաքելեան ազգանունն ծագումը, փոխարէնը՝ Արիստակէսը հօր՝ Սեդրակի անունով կրում է Սեդրակեան ազգանունը: Նախնական կրթութիւնը նա ստացել է էջմիածնի Ժառանգաւորաց դպրոցում, իսկ 1861 թ. Եղիազար Արքեպիսկոպոսի կողմից ձեռնադրուել է սարկաւագ՝ մերժելով «աշխարհը եւ անձնական բարիքները, հայրենի եկեղեցուն ծառայելու համար»³: 1863 թ. նա նշանակուել է Մոսկուայի հայոց

¹ Հայաստանի ազգային արխիւ (այսուհետ՝ ՀԱԱ), ֆոնդ 57, ցուցակ 2, գործ 1623, էջմիածնի սինոդի անդամ Արիստակէս Եպիսկոպոս Սեդրակեանի ծառայութեան ցուցակ, 1861-1891, 6 թերթ: ՀԱԱ, ցուցակ 2, գործ 1658, Աստուխանի հայոց թեմի առաջնորդ Արիստակէս Եպիսկոպոս Սեդրակեանի ծառայութեան ցուցակ, 1898-1906, 13 թերթ (այսուհետ՝ գործ 1658):

² Տե՛ս Յակոբեան Թ. Խ., Մելիք-Բախշեան Ստ. Տ., Բարսեղեան Գ. Խ., Հայաստանի եւ յարակից շրջանների տեղանունների բառարան, (այսուհետ՝ ՀՀՇՏԲ) հ. 2, Երեւան, Երեւանի համալսարանի հրատ., 1988, էջ 628:

³ Տէր-Մինասեան Վրդ. Երուանդ, Արիստակէս Սեդրակեան, «Արարատ», № Ա, Վաղարշապատ, 1907, էջ 51:

եկեղեցու սպասաւոր: Յաւօք, այդ շրջանի նրա գործունէութեան մասին տեղեկութիւնները սուղ են:

1865 թ. վերադառնալով Էջմիածին՝ Ա. Սեդրակեանը ձեռնադրուել է կուսակրօն քահանայ եւ 1866 թ. ստացել վարդապետութեան աստիճան: 1867 թ. Հոկտեմբերի 20-ին նշանակուել է Ղարաբաղի թեմի առաջնորդի պաշտօնակատար, իսկ երկու շաբաթ անց՝ Նոյեմբերի 4-ին, Սինոդի կողմից՝ Տաթեւի առաջնորդ՝ պաշտօնավարելով մինչեւ 1869 թ. Ապրիլի 6-ը:

1869 թ. Ա. Սեդրակեանը եղել է Երնշակ գաւառի Ապրակունիս գիւղի մօտ գտնւելող Ս. Կարապետ վանքի հոգեւոր առաջնորդ: Պատմական Երնշակ գաւառն ընդգրկուած է ներկայիս Նախիջեւանի Ինքնավար Հանրապետութեան Զուլֆայի շրջանը, Արաքս գետի ձախակողմեան ափը: Որպէս Սինեաց նահանգի համանուն գաւառ՝ այն յիշատակուած է VII դարից: Նշանաւոր Ս. Կարապետի վանքը (XIV-XVIII դդ., յայտնի է նաեւ Աբրակունիսի կամ Ապրակունիքի վանք անուամբ) համարուած է միջնադարեան Հայաստանի հոգեւոր եւ մշակութային նշանաւոր կեդրոններից մէկը, այն եղել է ուխտատեղի թէ՛ հայերի եւ թէ՛ մահմետականների համար⁴:

Վանական համալիրի մէջ մտնում են բազիլիկ, խաչաձեւ յօրինուածքով կառուցւած Ս. Կարապետ եկեղեցին, զանգակատունը, Ս. Ստեփաննոս մատուռը (կառուցուած՝ 1653-1656 թթ.), վանական երկյարկանի դպրոցը (այստեղ ուսուցչութեամբ են զբաղւել ժամանակի խոշոր մտածողներ Յովհան Որոտնեցին եւ Գրիգոր Տաթեւացին), մատենադարանը, պարտէզը, Կաթան սրբազան աղբիւրը⁵, խաչքարերը, շրջապարիսպը, առաջնորդարանը, հիւրատունը եւ օժանդակ այլ շինութիւնները⁶:

Հասկանալով կրթութեան եւ դպրութեան կարեւորութիւնը՝ 1870 թ. Ա. Սեդրակեանը ձեռնամուխ է լինում վանական դպրոցի բացմանը, որը կրելու էր «Գէորգեան վանական դպրոց» անունը՝ ի պատիւ Գէորգ Դ Կաթողիկոսի (1866-1882): Իր այս նախաձեռնութեան համար կաթողիկոսը նրան անուանում էր «ուսումնասէր եռանդով եւ բարեիդ ձգտումով անձ»⁷: Սակայն ինչ-ինչ պատճառներով դպրոցը չի բացւում, աւելին՝ 1874-1876 թթ. Գէորգ Դ Կաթողիկոսի նախաձեռնութեամբ հիմնադրուած է Էջմիածնի Գէորգեան ճեմարանը, եւ որպէս ժամանակի ուսեալ ու գիտուն հոգեւորական՝ 1874 թ. Սեպտեմբերի 5-ին Ա. Սեդրակեանը նշանակուած է նորաբաց ճեմարանի հայոց պատմութեան ուսուցիչ՝ ծաւալելով մանկավարժական ակտիւ գործունէութիւն: Յաւելենք, որ 1891-1893 թթ. նա եղել է Գէորգեան ճեմարանի տեսուչը:

1875 թ. Օգոստոսին Ա. Սեդրակեանը նշանակուել է Ներսիսեան դպրոցի հայոց լեզուի ուսուցիչ: 1876 թ. Յուլիսի 23-ին նրան առաջարկուել է Ղարաբաղի թեմի առաջնորդի պաշտօնը, որտեղ նա լուծել է մի շարք կարեւոր խնդիրներ: 1881 թ. Մարտի 3-ին Ա. Սեդրակեանը նշանակուել է Էջմիածնի Ս. Գայիանէ վանքի վանահայր, իսկ 1882 թ. Մայիսի 9-ին՝ Գէորգ Դ Կաթողիկոսի մահից մի քանի օր առաջ, ձեռնադրուել է եպիս-

⁴ Աւանդութեան համաձայն Ս. Կարապետ եկեղեցու աշակղովմեան խորանի օրհնուած հոդով բուժում էին օձի խայթոցը: Տե՛ս ՀՏԵՏԲ, հ. I, Երեւան, Երեւանի համալսարանի հրատ., 1986, էջ 313:

⁵ Աղբիւրը ժամանակին առատ ջուր է ունեցել, բայց ինչ-որ մէկը, անարգելով աղբիւրի գօրութիւնը, մեղք է գործել, որի հետեւանում էլ աղբիւրի ջուրը սկսել է կաթկթել: Տե՛ս Էփրիկեան Հ., Պատկերազարդ Բնաշխարհիկ բառարան, հատոր առաջին, գիրք Ա, Վեներիկ, 1903, էջ 721:

⁶ Սմբատեանց Մ., Նկարագիր Ս. Կարապետի վանից Երնշակայ եւ շրջակայից նորա, Տիփլիս, 1904, էջ 20-21:

⁷ Նոյն տեղում, էջ 27:

կոպոս⁸:

1883 թ. Յունուարի 7-ին Արիստակէս Եպիսկոպոսը ստանձնում է Վրաստանի եւ Իմերեթիայի թեմի հայոց առաջնորդի պատասխանատու պաշտօնը, որը վարում է մինչեւ 1889 թ. Նոյեմբերի 10-ը: Այդ տարիներին նա հիմնում է քահանաների ապահովութեան գանձարանը եւ հոգեւոր գործուն քարոզչութիւն է ծաւալում թեմի բնակավայրերում: Սակայն Մակար Ա Թեղուտցի Կաթողիկոսի (1886-1891) հետ տարաձայնութիւններ ունենալու պատճառով նրան հեռացնում են թեմից⁹: Հայ հասարակութիւնը սիրում էր նրան՝ համարելով կարգապահ եւ ճշտապահ հոգեւորական, քանի որ նա կարգ ու կանոն էր սովորեցնում իր շրջապատին՝ առաջինն ինքն օրինակ ծառայելով¹⁰:

1891 թ. Սեպտեմբերի 19-ին Ա. Սեդրակեանը դառնում է Սինոդի անդամ¹¹, իսկ 1893-1894 թթ.՝ Վաղարշապատի Ս. Շողակաթ եկեղեցու վանահայրը: Քանի որ նա հակասութիւններ ունէր կաթողիկոս Մկրտիչ Խրիմեանի (1891-1907) հետ, 1895-1905 թթ. նրան կարգում են Աստրախանի հայոց թեմի առաջնորդ՝ հեռու պահելով էջմիածնից¹²: Բանն այն էր, որ Ա. Սեդրակեանն ունէր մի խումբ համակիրներ ռուսահայերի մէջ, որոնց կոչում էին մշակականներ: Նրանք գործում էին Գրիգոր Արծրունու եւ «Մշակ» թերթի միջոցով՝ սատարելով Սեդրակեանին¹³: Այդ տարիներին նա դառնութեամբ էր տեսնում հայոց եկեղեցու անփառունակ վիճակը, եկեղեցական կարգ ու կանոնի կազմալուծումը¹⁴:

Հակասութիւններն այն աստիճան են սրում, որ նոյնիսկ փորձում են սպանել Ա. Սեդրակեանին: Այս առումով ուշագրաւ է արխիւային նամակներից մէկը, որտեղ նամակագիրը՝ Նիկողոս Ամիրեանը, զգուշացնում է Ա. Սեդրակեանին, որ Թիֆլիսից Քարուանսարայ (ներկայիս՝ Իջեւան) ճանապարհին իր եւ Երեմիա Եպիսկոպոս Գալստեանի դէմ մահափորձ է ծրագրում՝ դեղով կամ ատրճանակով, որպէսզի միաբանութիւնում խաղաղութիւն հաստատուի¹⁵: Հաւանաբար նամակի բովանդակութիւնը կեղծ էր, եւ այն նպատակ ունէր պարզապէս վախեցնել Եպիսկոպոսին:

Արդէն Մակար Ա կաթողիկոսի մահից յետոյ (1891 թ.) Երեմիա Եպիսկոպոս Գալստեանի հետ Ա. Սեդրակեանը փորձում էր պայքարել կաթողիկոսական աթոռի համար, բայց, ինչպէս վկայում է Օրմանեանը, «որովհետեւ երկուքը միանգամայն չէին կրնար կաթողիկոս հռչակուիլ, համերաշխ գործակցութեան քօղին ներքեւ փոխադարձաբար զիրար խաբելու նենգաւոր դերը կը վարէին»¹⁶: Ենթադրում ենք, որ Մայր Աթոռում Ա. Սեդրակեանին համարել են ցարական կառավարութեան գործակալ, ռուսամէտ, որի հետեւանքով էլ փորձել են հնարաւորինս հեռու պահել Ամենայն հայոց հոգեւոր կեդրոնից:

Ա. Սեդրակեանը մեծ դեր է ունեցել հայ գրականութեան եւ պատմութեան ուսում-

⁸ Օրմանեան Մ., Ազգապատում, հ. Գ, Երեւան, 2001, (այսուհետ՝ Ազգապատում), էջ 5112:

⁹ Ազգապատում, էջ 5342:

¹⁰ Տէր-Մինասեան Վրդ. Երուանդ, Արիստակէս Սեդրակեան, «Արարատ», № Ա, Վաղարշապատ, 1907, էջ 52:

¹¹ Սինոդը բացուել է 1837 թ. Փետրուարի 22-ին Յովհաննէս Ը Կարբեցի 1831-1842 Կաթողիկոսի կողմից: Գործել է մինչեւ 1917 թ.: Տէն Քրիստոնյա Հայաստան հանրագիտարան, Երեւան, 2002, էջ 907-908:

¹² Ազգապատում, էջ 5375:

¹³ Ազգապատում, էջ 5378:

¹⁴ Տէր-Մինասեան Վրդ. Երուանդ, Արիստակէս Սեդրակեան, «Արարատ», № Ա, Վաղարշապատ, 1907, էջ 53:

¹⁵ ՀԱԱ, ֆոնդ 57, ցուցակ 1, գործ 158, Նամակներ, էջ 43-47:

¹⁶ Ազգապատում, էջ 5373:

նասիրութեան գործում. «Ինչ որ կարողացել է, այն է արել նա. եւ իւր ստացած ուսման համեմատութեամբ բաւական արժէքաւոր են նրա երկերը»¹⁷: Նա ուսումնասիրել եւ նկարագրել է հայոց պատմութեանն ու մշակոյթին վերաբերող բազմաթիւ յիշատակարաններ, հայկական բանահիւսութեան նմուշներ (օրինակ՝ տեղագրական, վիմագրական «Հնութիւնք հայրենեաց ի գաւառին Երնջակու»՝ 1872 թ., «Քնար մշեցւոց եւ վանեցւոց»՝ 1874 թ.), քննութեան է առել XIX դարի առաջին կէսի հայագիտութեան եւ լուսաւորչական շարժման պատմութիւնը, հրատարակել է «Յարութիւն Արարատեանի կեղծիքը», իսկ 1894 թ.՝ «Յովհաննէս Եպիսկոպոս Շահխաթունեանցի կենսագրութիւնը»: Նրա աշխատութիւնները նուիրուած են հայ եկեղեցու պատմութեանն ու դաւանաբանութեանը: Յիշատակութեան են արժանի 1904 թ. Ս. Փեթերսպուրկում հրատարակուած «Հայաստանեայց եկեղեցու պատկերագրութիւնը» ծաւալուն աշխատութեան առաջին մասը (երկրորդ մասը լոյս չի տեսել. այն ձեռագիր վիճակում պահոււմ է Հայաստանի ազգային արխիւում¹⁸), ինչպէս նաեւ «Ամուսնական խնդիրներ» (1891 թ.) եւ «Քահանայական խնդիրներ» (1900 թ.) աշխատութիւնները, թարգմանութիւնները, անտիպ գործերն ու նամակները: Նամակներից մէկում կարդում ենք. «Կան գրքեր, որոնց պարունակութիւնը պատճառ է ընթերցողին ներքին բաւականութեան հետ խորին թախիծ, այդպիսի տպաւորութիւն թողեց ինձ վերայ Ձեր «Քահանայական խնդիրները»»¹⁹:

Մեր ուսումնասիրութեան համար առաւել կարեւոր են նրա հաւաքած տպագիր եւ անտիպ վիմագրերը, որոնց թիւն այնքան էլ մեծ չէ՝ մօտ 100 միաւոր: Նշենք, որ արխիւային նիւթերում մեզ յաջողուեց գտնել անտիպ երկու վիմագիր Արագածոտնի մարզի Բիւրական գիւղից, որոնք, ցաւօք, մեզ չեն հասել: Յայտնի է, որ Բիւրականը եղել է կաթողիկոսական ամառանոց, որտեղ պարբերաբար շինարարական աշխատանքներ են կատարուել: Դեռեւս Գէորգ Դ Կաթողիկոսի կողմից կառուցուել է ընդարձակ ամառանոց, որի պատին շինարար կաթողիկոսը թողել է հետեւեալ արձանագրութիւնը. «Ի ՀԱՅՐԱՊԵՏՈՒԹԵԱՆ ԱՄԵՆԱՅՆ ՀԱՅՈՑ ՏԵՐ ՏԵՐ ԳԵՈՐԳ Դ ԿՈՍՏԱՆԴՆՈՒՊՈԼԻՏԵՑԻ ՇԻՆԵԱՅ ԶԱՅՍ ՀԱՅՐԱՊԵՏԱԿԱՆ ԱՄԱՌԱՆՈՅ Ի ԲԻՒՐԱԿԱՆ ՅԱՄԻ ՏԵԱՌՆ 1874 ՌՅԻԳ»²⁰:

Նա մէկ այլ արձանագրութիւն էլ է գրառել, սակայն չի նշել, թէ գիւղի որ հատուածից. «ՅԻՇԱՏԱԿ Է ՏԵՐ ՊԵՏՐՈՍԻՆ / Ի ԴՈՒՌՆ ՍՈՒՐԲ ԳՐԻԳՈՐԻՆ / Ի ԹՈՒՆՆ ՌԾ (1601)»²¹: Բիւրական գիւղի պատմական յուշարձանների ցանկում, ցաւօք, Ս. Գրիգոր եկեղեցի կամ մատուռ չի յիշատակուում: Ենթադրում ենք, որ վիմագիրն այլ վայրից է գրառուած, կամ էլ տուեալ յուշարձանը պարզապէս մեզ չի հասել:

Արիստակէս Եպիսկոպոսը հոգեւոր ծառայութեան համար արժանացել է մի շարք պարգեւների ու շքանշանների. 1876 թ. ստացել է ծաղկեայ փիլոնով պաշտօնավարելու, 1877 թ.՝ լանջախաչ կրելու իրաւունք, իսկ 1882 թ.՝ պանակէ, որը տրուում է կաթողիկոսի կողմից Եպիսկոպոսին եւ խորհրդանշում է եկեղեցու սպասաւորի սէրն ու յարգանքն Աստծոյ հանդէպ: 1896 թ. նա ստացել է Ս. Վլադիմիրի շքանշան սուլթանի կողմից՝ ի նշան

¹⁷ Տէր-Մինասեան Վրդ. Երուանդ, Արիստակէս Սեդրակեան, «Արարատ», № Ա, Վաղարշապատ, 1907, էջ 54:

¹⁸ ՀԱԱ, ցուցակ 1, գործ 269, Ա. Եպս. Սեդրակեանի «Հայաստանեանց եկեղեցու պատկերագրութիւն» աշխատութիւնը, 1890, 16 թերթ:

¹⁹ ՀԱԱ, ցուցակ 1, Գործ 258, Աստուխանի թեմի առաջնորդ Ա. Արք. Սեդրակեանին ուղղուած նամակները՝ յոբելեաններ կատարելու, գրած աշխատութիւնների, պաշտօններ ստանալու, դպրոցներ բացելու, բարեգործական խնդիրների մասին, 1888-1905, թերթ 23ա:

²⁰ ՀԱԱ, ցուցակ 1, գործ 179, Մեսրոպ Արք. Սմբատեանցին ուղղուած նամակներ, 1875-1914 թթ., թ. 73 ա:

²¹ Նշ. աշխ., թ. 75 ա:

Երուսաղէմ կատարած այցի²²:

Ա. Սեդրակեանը վախճանուել է 1906 թ. Նոյեմբերի 10-ին՝ 61 տարեկան հասակում: Իրարամերժ փաստերից տեղեկանում ենք, որ նա մահացել է Թիֆլիսում²³ կամ Վաղարշապատում²⁴: Վաղարշապատի տարածքում որեւէ տապանաքար չկայ նրա անունով, սակայն մեզ յայտնի է, որ Էջմիածնի միաբանութիւնը Վաղարշապատում կատարել է հոգեհանգստեան կարգ²⁵, իսկ Թիֆլիսում 1907 թ. Յունիսի 18-ին Մատթէոս Բ Կաթողիկոսի (1907-1910) կողմից բացուել է նրա տապանաքարը²⁶: Հաշուի առնելով այն հանգամանքը, որ Թիֆլիսի հայկական յուշարձանները մեծ վնաս են կրել 1920-30-ական թթ.՝ ներկայումս ոչ մի տեղեկութիւն չկայ նրա տապանաքարի գտնուելու վայրի մասին:

Ա. Սեդրակեանի անտիպ ուսումնասիրութիւնները, անձնական նամակներն ու այլ փաստաթղթերը պահուում են Հայաստանի ազգային արխիւի Կաթողիկոսական դիւանի թիւ 57 ֆոնդի 1 եւ 2 ցուցակներում. նրա անունով առանձին ֆոնդ չի ստեղծուել: Արխիւային փաստաթղթերում մեծ թիւ են կազմում նրան ուղղուած բազմաբնոյթ նամակները, որոնցում նրանից խնդրում են ոչ միայն դրամական օգնութիւն, այլեւ միջնորդութիւն՝ հոգեւոր պաշտօնների նշանակելու, աշխատանքի ընդունուելու կամ անգամ զինծառայութիւնից ազատուելու համար: Նամակագիրները նշում են, որ Ա. Սեդրակեանը լուրջ, սակաւախօս, պարտաճանաչ եւ պատկառանք ներշնչող անձնաւորութիւն էր, թէեւ որոշ հոգեւորականներ թերագնահատում էին նրա գործունէութիւնը:

Ա. Սեդրակեանը թողել է անտիպ յիշատակարաններ, որոնք կարեւոր սկզբնաղբիւր են ժամանակի հայ հասարակական, քաղաքական ու մշակութային կեանքի ուսումնասիրութեան համար: Լիայոյս ենք, որ տարիների խորքից աւելին կիմանանք հայ երախտաւոր Արիստակէս Եպիսկոպոս Սեդրակեանի հոգեւոր եւ հայագիտական գործունէութեան մասին: Նրա ազգանպաստ գործունէութիւնն ընթացել է պատմական այնպիսի փուլում, երբ հայ իրականութեան մէջ առաջնային էին ինքնութեան պահպանումը, կրթամշակութային կեանքի վերագարթօնքն ու եկեղեցական ինքնավարութեան ամրապնդումը:

Այս համատեքստում նա հանդէս է եկել ոչ միայն որպէս հոգեւորական, այլեւ գիտական մտածողութեամբ առաջաւոր հայագէտ, որի համար կարեւոր էին հայ եկեղեցու պահպանութիւնը, կրթական գործը, մշակոյթն ու ազգային շահերը: Նրա գործունէութիւնը կարելի է համարել հայ եկեղեցու պատմութեան եւ հայագիտութեան զարգացման կարեւոր փուլ, որտեղ հոգեւոր ծառայութիւնն ու գիտական որոնումները փոխլրացնում են միմեանց՝ ձեւաւորելով ազգային-եկեղեցական ինքնութեան պահպանման կարեւորագոյն նպատակը:

ՍՈՒՍԱՆՆԱ ԱԳԱՄԵԱՆ

Պատմ. գիտ. թեկ., ՀՀ ԳԱԱ ՀԱԻ, գիտաշխատող

²² ՀԱԱ, ցուցակ 2, գործ 1658, թերթ 2-3:

²³ Մահագոյժ, «Արարատ», № Ը-ԺԱ, Վաղարշապատ, 1906, էջ 711:

²⁴ Սեւայդարեան Եպս. Գ., Գաւազնագիրք Վրաստանի հայոց թեմի, «Էջմիածին», Թ, Ժ, ԺԱ, 1992, էջ 74-93:

²⁵ Մահագոյժ, «Արարատ», № Ը-ԺԱ, Վաղարշապատ, 1906, էջ 711:

²⁶ Ազգապատում, էջ 5932: